

# Paulsh COLOSSAE kuhtée akchiwakíialaxuahcheesh ala kuss baawaalaátdeehcheesh hinné koók.

---

“Shóotaachi?” hek Paulsh.

**1** <sup>1-2</sup>Awaasúalahum Colossae huuash kuhtée koon Akbaatatdía is bilaxpáakeesh akchiwakíiwakupuuash hawátuum ak iluuáahkuum Christ ak kalátcheesh ko díiluss baawalaáchik. Hilísh Baksáau Akbaatatdía dii íchishikaasak dii daásdeekaashdakuulak ko ii bahchiwakáak baakoon ítche dii daachíhchelak baliachik. Paul huuash bíik. Akbaatatdía daasalakootéesh koóm ii Christ Jesus bacheeiiaxpíluupeesh ko bii hawák. Baleiichiweeítcheesh bii aák hawass dáawihchek. Haak akchiwakíiwakupua Timothysh awáxpeesh koók.

**Paulsh Colossians ala chiwakáakuuash**

<sup>3-4</sup>Christ Jesus an dáhkalatchekaasuuash dak Akbaatatdía is bilaxpáakeesh al aláchissuuash dak ii biikukkáawahkuk. Heem Baxxiilaatúua Jesus Christ Iilápcheesh Akbaatatdía kusséesh “Ahóoh.” baawalakuiluk bahchiwakáawalakuutatchia. <sup>5</sup>Deéla baleiichiweeítcheesh ala koottáahiluum kal an dii chiwaáuwasseelak kal

élahcheitchiluuk. Heem an baawiish dilíachkaatdeesh kuk Anmaaiiwaakoochihtéesh koon kulaalákak daachík. Kalako ii Christ Jesus dáhkalattaak dalásiisaalaak Akbaatatdía is bilaxpáake aláchissuuk. <sup>6</sup>Baleiichiweeítcheesh kal an díikukkak kalakoon dáhkalattaak dii anníhiissuuhtaa Akbaatatdía kootáa dii daásdeekaashdakuuash kukaakan awé kootáa iikukkaláaliok. <sup>7</sup>Biilápaachkaatuash Epaphras an dii áxp iichiwaáush koók. Hinna Epaphras balee áxpak baa hilím Christ ishkwáashim ak iluuáalahkakuuash koók. <sup>8</sup>Bale bach íchissuum Baleiláaxbaaxpeesh dalásawuuan dúushiash ak balee chiwaawilikkúuash koók.

<sup>9</sup>Heem ko baapé an dii biikukkúuash kukaakan bahchiwakáawalakbakaauk. Hilísh Baleiláaxbaaxpeesh dii kuksák Akbaatatdía daasalakootéesh dii éhchekaashihkaalakuulak baliatuuk. <sup>10</sup>Kal ii íwahkoteesh Akbaatatdía an dii bilaxpáake shóotaatchewialak kala kootíihmaachik. Haak ammaa an díaleesh ii daásitchiihmaachik. Heelak an dii bilaxpáakeesh ítchilak ammaa díaluuash ítchilak Akbaatatdía al élahkuuash kannaa baatchaataálawiihmaachik. <sup>11</sup>Hilísh Akbaatatdía an baatcháachim ii baa ítchikaateesh ii dii díahchelak kan baatát baalúukaasak heelaht dalásuuash baakoon íttak dakaálohmaachik. <sup>12</sup>Heelak Dákssau Akbaatatdía kusséesh “Ahóoh.” duulak kala koók. Ala koolám sáasaalaacheesh koon is bilaxpáakeesh aláxpak ak dii ala koónmishihcheesh koók. <sup>13</sup>Chíisbishe an bacheeítcheesh ala chihpashéesh koon balee ihch alíinneetam Akbaatatdía balee kulustakuuák dáakbacheem íchissheesh an bacheeítcheesh koon balee dúushiik. <sup>14</sup>Heem dáakbachee is íleesh ii balee kulustawilikkuuák kootáa baa ala kxawíanniawuuash kalaaxtawilikkúúk.

### Christ baa íschiisaaleeteesh

<sup>15</sup>Akbaatatdía awákaassuuhtaa dáakbachee kala kootáahileesh koók. Íschiisaataahilia kukaa ammaa an díash xaxúa dáakbachee koolák baatách xaxuatáahilia áakaachiisaa iiléen hawasséek. <sup>16</sup>Akbaatatdía dáakbachee kuttáchkaat chúuss baa hilák baatách xaxuatáahilia díakuuk Anmaaiiwaakoochihtéesh dak awé áake dak baa

ala koolúuash haak baa al awákuua dak baa al awákaassuua dak. Deéla hileen awé dak awáxe isaakuamméaxeen bale iláaxbaatchaatshiishiaahe bacheeítcheesh an baaláhkuuash dak bilaxpáakiexpawishe dak kúh díakuuk. <sup>17</sup>Dáakbacheesh hileen baatách xaxúa it koolássuuash kukaa ik koolák. Heem dáakbacheesh ii baatách bat shéess dúuxaasheesh koók.

<sup>18</sup>Deéla ak baa kalátche Axxiilaatúuash koók. Saák chilaák heem baatách xaxuatáahilia baa basséesh koók. Ittáchkaatak ak kootéesh. <sup>19</sup>Akbaatatdía ala kootéesh xaxuatáahilia dáakbachee kúh kootám ammaa isítcheesh koók. <sup>20</sup>Deéla dáakbachee baa ala chúuss dáak baawatbakálee koon shéesh ii baa annawéewiam kalakoon Akbaatatdía an balee ala kootéesh al isítcheesseesh xaxúa bitáaxiiak baatách xaxúa awé áakeesh dak Anmaaiwaakoochihtéesh kuhtaa dak ihchi balee kooxiíawiak. Dáakbachee is íle baawatbakálee koon xéhcheesh ii koochéek.

<sup>21</sup>Ikaak hawáttaa Akbaatatdía dak dii baa dúuppeetaahiluuk. Akbaatatdía kuss alákaawialaassuuk. Ammaa kxawíannualuuash dak an baa dáasshihtuuash dak Akbaatatdía al iichúuluuash dak ko ii kooták. <sup>22</sup>Heehaa hilaakée Ischawúuan Dakkaasúua awé áakeen bilaxpáakak kalakoon saalákuuk. Ii dii hoowéettaak ii dii ammaa ala shiíoleetchek. Hinna íwahkoteesh hilaa Akbaatatdía ishóocheesh dii aaliíok. <sup>23</sup>Kooták. Díluh kal an baa dáhkalatcheesh kannaa díalaakaasak ammaa áakeen díluulituaa chichútuulak koók. Baleiichiweeítcheesh díikukkak kalakoon baawiísh dilíacheesh déelahchessaalak dii baa hoowéetak Akbaatatdía ishóoche daliíolak kala koók. Paul huuash bíik. Ishkawáashe ko bii hawák. Bíh Baleiichiweeítcheesh aák hawass baaláwak bilaxpáake baachiwaawakúk. Hinna Baleiichiweeítcheesh kan bilaxpáake al ahkaásheesh iikukkúuk.

**akchiwakáaum Colossae kuhtée kooléesh  
Paulsh an baa hilakúuash**

<sup>24</sup>Ischawúuan Dakkaasúua an baatcheesshíiak an baailísheekaasheesh akchiwakíash axúa koóush ko díakuuk. Hilaakée bíh ammaa ala chúuss baaláawalakak hinna baxúash an daxxeexéetaak an baawilísheesh ammaa díaweesh

dak ii Ischawúuan Dakkaasúua axúash akchiwakíiash an baailísuuash ii uhpé hiilák baliachik. Bíh hilíichiisaa ii balaséesh ítchik hinna ammaa ala chúuss baaláawalakuuash. <sup>25</sup>Deéla Akbaatatdía bii dúttak akchiwakíiash xaxuatáahilia bii baa hilakuúhchek. An bii báasheesh is baaaliichiweeítcheesh al ilíiash bii dii chiweeítchihkuuash koók. <sup>26</sup>Baapammasshipúuash Akbaatatdía ammaa íkuchkim xíakaateesh bilaxpáakkootaa éhchehchesseesh kala hilaa is bilaxpáakeesh éhchehchek. Haak hilaakée Akbaatatdía ammaa íkuchkim bilaxpáake bii iichiweéhchek. <sup>27</sup>Akbaatatdía ammaa íkuchkeesh kala hilátak. Hinna ammaa xíakaatam baatcháacheesh is bilaxpáake xaxúa al éhchehchewiash koók. Hinné koók. Christ iláaxe dalásuuash awúualak. Heem Akbaatatdía al ítchikaateesh alasáashiiwaaxpeesh díiluh kan dii baaláhkuuk. Heem awé kootáa bilaxpáake éhkuulak baaláhkuulak hiliachik. <sup>28</sup>Heem kala shóon baáu Christ kal ii baláak baannátchiihewahchewiawaak. Haak bilaxpáakkootaa kúh shóocheelush daatdak baachiwaáuk baa al éhcheilush daacheesh. Heelak an bilaxpáakuuash kulussáak kan bilaxpáaktaahiluulak baliatak Akbaatatdía ishóocheesh aawífolak kan baatách éhkuulak baliachik. <sup>29</sup>Iwahkootbaawiawaam ammaa díawee baalúukaashik. Heehta Christ an baatcháacheesh ii bii kuxsák heem bii áxpak an baa hiléesh xíasseetak baatcháachik.

**2** Hinné dii éhchewahchewiawaak. Hilaakée an bahchiwakáawalakuuash baatcháatbaak. Haak awaasúualahum Laodicea huuash kuhtée akchiwakíialaxuahcheesh kúh koótbaawakuk. Deéla biilápaache ihée ahúm kúh bach ísawakuuleetaht kootáa koótbaawakuk. <sup>2</sup>An bahchiwakíiash hinné koók. Ammaa an díaluash díixaxua dalásatchutak ii díixaxua bach aláchissak ii koowáte baa díaluulak baliachik. Akbaatatdía baam xíakaateesh kan díixaxua díiluss xíassaahcheihmaachik. Hinna baa xíakaateesh Christ koók. <sup>3</sup>Heem ittáchkaatak kal ii Akbaatatdía baa íkuchkawilikkuum éwahchekaasuuash koók. Kúmamaam baa ítchikaashe ahkaásheem aaxuóolak awóolapuulak ko kala kooták. <sup>4</sup>Ii dii baachiwaáush éhkoon sapélicheem huuák ilíiitchikaattaak al ilíia baa an dútcheessheetdak ii dii kúawioolak díassalah.

<sup>5</sup>Ii íwahkoosheeweesh bii éhkkoolassaahaa dii basshihtawakaáiluk. Ammaa dáassihcheesh éwahkaak an dii ala kootúuash kúh éwahchek. Heem an bach aláxpak díluuak Christ an dáhkalatchekaasuash ii balaséesh ítchik.

<sup>6</sup>“Christ Jesus Dáxxiilaatuash koók.” duum kan dáak an dii bilaxpáakeesh ítchiiak ammaa dii díahkuua díakaalah. <sup>7</sup>Haak Christ Jesus ko kuss kaláak ko díhchi kuxshíhkaalah. An balee díahche kuk kal an dii bilaxpáakuua koóish daachik. Baa ala koottáhileesh al ii dii baachimmíwahkuuash baa dáhkalatchekaasak ko ii dii dakúxsaatuash koók. Heem ammaa an díalakuuash xaxúa kal ii kusseé “Ahóokaashilah.” haaattaalah.

#### **Aaláa ak baáililiihaatcheem dii héelass duóh.**

<sup>8</sup>Heem íkaak hileen bacheéom ak baa baachimmíhche iháatcheesh íassiaalah. Aaláa bilaxpáake ílala an baa dasshihtúuash ii díhchi dáaxchiloh. Ko bachéesh hilíashiiok. “Kal an buúwaaliosh baaisáate an balee bilaxpáakiish daacheesh balee baáililaush koók.” helitdeleluuk. Báheelia al iláaush awuúleetuuk. Iwahkooteesh Chíisbishe awé ak hawasséesh ko díahchek buh. Jesus hileén ko baa hilíssuuk buh. <sup>9</sup>Christ Akbaatatdía koók. Akbaatatdía bilaxpáakdem Jesus koók. Akbaatatdía ala kootéesh xaxuatáhilia Jesus kúh koottáhilik. <sup>10</sup>Christ dak dii bach hawátkaatum heem Akbaatatdía koóm bale bilaxpáake ii baa koochihtéesh dákuk. Deéla hileen bale iláaxshiishiaahaacheesh dak baa an bacheeíttaacheesh dak xaxúa Christ áakaachiisaataahilia koolák baa íschiisaaleetak. <sup>11</sup>Christ an dáhkalatchewasseesh is alóoshe dii kussíok. Bilaxpáakan díassuuk. An dii bilaxpáakuua dáhkukuuash kalakoon baa ala kxawíannialuuash dii dáacheehkuuash kala kootássaak. <sup>12</sup>Heem kala hilíatak. Ischawúuan Dakkaasúua saalákuum dúusaauh heelak dii bilihpíhkuuash bilé dáalahpeesh díluh aláxpak dii dúusaaulak ko kala kooták. Deéla Akbaatatdía an baatcháacheesh ii kaka chiléhcheesh dáhkalattuuash díluh kal aláxpak bale shéesh kala koon dii chiléhkuulak ko kala kooták hilaakée dii ilíiok. <sup>13</sup>Haak Jews kootássaa sheen Christ it dáhkalatchesseesh koottalée baa ala kxawíannialuua ahóosh ii díhkulupiassuum dásuulak ko kala kooták.

Akbaatatdía is bilaxpáakeesh dii hawássuuk. Heehtaa hilaakée Akbaatatdía dii chiléhkaak kaka dii bilaxpáakahchem dii ilíom Christ ii aláxpak dii bilaxpáakuuk. Haak Akbaatatdía koóm baa ala kxawíanniawuuash xaxúa kalaaxtawilikkuúk. <sup>14</sup>Haak hileen baa ala kxawíanniawuuash xaxuatáahilia an baalaátuuash kalako ii Bilée Isée héelass balee déehchewiash kulushíichik. Xaxuatáahilia baawatbakálaam Ischawúuan Dakkaasúua kuss dakkaasúuash dakkaasák ii baa haawéetaahilik. <sup>15</sup>Ischawúuan Dakkaasúua baawatbakálaam koon shéehcheesh ii hileen baaaxualeetxawíash dak is bacheeittuuash dak xaxúa Akbaatatdía kon axsaák al íkaataahiluuan haawéetaahilik.

<sup>16</sup>Kal ii íwahkootak. Heem bale ammaa duushéesh dak bale ammaa isshíash dak sapéelahtaa “Eek duushíssaah.” “Eek isshíssaah.” helak diikukkussaáhaalah. Haak sapéelahtaa “Hileen bilítaachiia hilaakát kootáa baapalisáat baa saxpilaatát haak baapchikittúua baalíhammaataalah.” helak kúh diikukkussaáhaalah. <sup>17</sup>Heem baa íwahkooteesh Christ iláaxaxeelicheesh koóuk. It húussaak hileen baam ko iichiwaáuk. Heehtaa hilaakéesh Christ húum kan baa hámneetak. <sup>18</sup>Deéla hileen hawátuum kúh “Bik ammaa bii íkaahcheesh baatcháachik.” helitdaak kalakoon ii ihchi báaxxiialituuk. Hileén kuk baa hámneetaatum ko ii iláum kootaachéesh ii díhchi baa haawaátchessaalah. “Cheéshbeewiilush daachik.” helitdaak. “Bilaxpáakiexpawisuum kuss bahchiwakíiwiiilush daachik.” helitdaak. “Baawaashíalim hileén díaalalah.” helitdelohtaa díikukkussaalah. Iilaa ammaa dasshihtúua koóuk. Akbaatatdía ammaa dasshihché kussaak. Iwahkoote kalako ii is biipúuleetak ihchi báaxxiiook. <sup>19</sup>Heem Christ bas bassáau koóhtaa kuk kal akúss shítuuk. Akchiwakíiash Christ axúash koóulak ko kala kootúuk. Haak kúh Axxiilaatúuash koók. Kón balee hawasséek. Balee aashúua balee axúa hawasséelak ko kala kooták. Heem deéla al ii balee bishé Akbaatatdía kúh an daasalakooté ko díak.

<sup>20</sup>Ischawúuan Dakkaasúua shéesh kúmamaam aláxpak dásheek. Heem hileen awé dak báakukko dak baa al ii dii awáss daxchéesh kala haawík buh. Sáapam ii it ak kootaátdelelo? Haak sáapii íisko an baa hilúuash

it díaluu? <sup>21</sup>“Eek kuleéssaak ii díassaalah.” haak “Eek dúuwusseessalah.” haak “Eek dússhihchissalah.” huuk. <sup>22</sup>Hileén xaxúia Akbaatatdía ii díawuulak hiliachik. Heem baakoon ii díawaak áawahkuulak aliípdeetak kuk kal ii baa hámneetiohmaachik. Eek bacheeichkáate íilaa hileen baa íkuchke díook. Ii baa baáliliilitdelelok. <sup>23</sup>Hileen bilaxpáake díilaachkissuum baalúukaassuuash díaahkoosh íttuuchicheek. Heehtaa kootássuuk. Haak ihchiháakahchelelelok. Heem baaláttaauchicheek. Heem hileen ammaa íkuchkaatdoosh bíinmaxuúoosh an balee kuxsaátdeetak. Kooták. Ammaa díawuua dak ammaa basshihtúua ii it baa ala kxawíanniawaak baa al iháateesh it buluxáasuuk.

### Jesus an baaxpéesh koótdewiaalah.

**3** Ischawúuan Dakkaasúua bale shée koon kaka chiléesh díiluh kal aláxpak dii kootúuk. Christ awáxpak kaka balee bilaxpáakam báakukkoko baa ala kooléesh ko kuss dasshihtáalah. Christ ala kooléesh koon Akbaatatdía ilapáko Christ awáachihcheesh ko ii chikittaakuúm áxpak bacheeíttalaachik chikittaakuuák áxpak bacheeíttalaachihchek. <sup>2</sup>Heem báakukkoko ammaa ala kooléesh kalako dasshihtakáalah. Hinna awé áakeesh baa ala kxawíash kuk baaleetak. <sup>3</sup>Iwak ii koótdaaliilush dacheesh kúmmaam Ischawúuan Dakkaasúua aláxpak dásuulak ko kala kooták. Heehtaa hilaakée Christ dii bach hawátkaatak díilapte Akbaatatdía aláxpúuash díiluk. An dii bilaxpáakuua Christ aláxpúuash díilum it alaaxtúuk. <sup>4</sup>Heem Christ an dii bilaxpáaktaahiluash dákuuash chishhíilak kal aláxpak dii koolíohmaachik. Christ ala chikittaakuuwoosh an dii chikittaalákbioosh koók.

<sup>5</sup>Ikaak hileen dalátaawuush al iháateesh dak aláxushkawaau dak an baa ilusshít dia xaxúia awé awuússiiaalah. Dalátaammaatchaachissalah. Ak baa kalátchesseesh ammaa ítchihche eewíassalah. Hileen ammaa deewíaluush kuss dáhchiwakaaulak ko kala kooták. <sup>6</sup>Heem Akbaatatdía hileen ak koochéesh kuss baa daaskawíikaashim datchúshkaasheesh al íkuxxee híihmaachik. <sup>7</sup>Deéla ísko an dii bilaxpáakuuash hileén koótdaak dalátaawuua al iháateesh

ii dii ihch alínneettaahileek bah. <sup>8</sup>Heehtaa hilaakée ak baa kaláttuuash díiluk. Hilaakée bale daaskawíash dak bale daásbahteesh dak bale daasáakeesh dak bale batshúataahile kalako ii baa iáxxohcheesh dak baa al ilíiwisak bale bísssheesh dak bale daasshéesh dak bale kaattéesh dak kal ii dúupe ii díassaalah. <sup>9</sup>Haak bat shéess bísshissaaalah. Ísko an dii bilaxpáakxawaaush dak dalátaawíwxawaaush koóum kal awé awússaalum kan baa haawík buh. <sup>10</sup>Heem ísko an dii bilaxpáakuuash Christ bitáaxiik kan dii hilaakkáattuum kala hilaakée an dii bilaxpáakuuash Christ ala kootéesh kan dii kala kootúuk. Heelak Christ ii ala kootáahileesh kannaa élahkaalaaliolak hiliachik. <sup>11</sup>Kalako ii kal an balee al iháatdeetak. Jews kootá dak ak kootássaa dak baa áaxxaapashku dak ak kootássaa dak bilaxpáakihee dak baa dáacheehkuua dak ak kootássaa dak hileen xaxúa kan bach kuxxúuk. Dii an bilaxpáakshootuulahtaa Christ kan baa kuttáchkaatak iláaxe biixaxúa balee axúa kal awúualak.

<sup>12</sup>Akbaatatdía is bilaxpáake baaxpéesh díixaxua díiluk. Heem dii íchissuuk. Hileén ii díaalah. Baa baailíssuaa kuxsáalah. Baa daásdeeak dii bilaxpáakittaalah. Cheéshdaak baa axsheewíassaalah. Dalátaawitchikaataalah. An dii bilaxpáakuua díhchi chíkaakaalah. Baaeétíliissaaalah. Dalásatchutaalah. Baakoon dakaáulak kala koók. <sup>13</sup>Bat shéess baawishíttaalah. Hileen akchiwakíia hawá ala xatáau ihaakkéesh takaatuuk. Kusséesh dalásdeeteetak kalaaxtakuuáalah. Haak dii dahéelak kalaaxtakuuáalah. Hinné chichéhkaalah. Baxxiilaatúua baa al iháatduuash kalaaxtalákuuk buh. Díiluh kootáalah. <sup>14</sup>Iwak xaxúa koótdaaliilush daachik. Kúh bach íchissaaalah. Iwak kala héele baatcháacheesh koók. Kal ii baatách koowáteeak ii ítchikaateesh koók. <sup>15</sup>Heem an bach aláxpak áalahkuuash al íttaalahkuuash Christ dákuuash kalako ii díixaxua dalásuaa díalaak ashishkawuuhawáteeesh ko kala kootáalah. Akbaatatdía baa an dalásaliatdeetdak hiliatak dii bach aaliíom ii dii koowáteeosh koók. Heem Akbaatatdía kussee baa “Ahóoh.” haak káalah. <sup>16</sup>Christ al ii iláush ítchikaatak baatcháachik. An baa dáasshihtuaa dak dalásuaa dak awúuan dúusaalah. Haak ammaa al élahkuuash bach ówiiak ii bat baálilaalah. Heelak Buuwaaxpéesh dak chiwakíwalaxuaa



dak Baawaalaáchim Baaxpéesh awúuan an baalaátuua dak ii baláxkissalah. Dalásawuuko Akbaatatdía kuss baláxkissak dáashe báaxxiak kusseé “Ahóoh.” haalah. <sup>17</sup>Heelak kuk kala sáapdialaawialaa xuh sáakdaawialaalak Baxxiilaatúua Jesus ak baaláhke díim an díhchi dilútche ítchiiaalah. Jesus ammaa díalakuuash ii Baksáau Akbaatatdía kusséesh “Ahóoh.” haakaalah.

**Ishkawuuhawáte akchiwakíia Paulsh baa íkuchkakuuk.**

<sup>18</sup>Bía dussheen ak chínmisheesh dii akchiwakíiash dachílaau díš ashishkawuuhawáte axxiilaaché koók. Al iláau díikukkaalah. Baxxiilaatúua ak baaláhke an díoosh an díalaaliilush daacheesh koók. Iwak annawík. <sup>19</sup>Bacheé dussheen duóo íchissakuuak chikittaakuuáalah. ak Díštaachkaasshessaa daásdeekuukaalah. <sup>20</sup>Baakáateen díiluh dáhchiwakaauk. Kal an díalaaliilush daacheesh dáksaau al iláaush díaalah. Koótduulak Baxxiilaatúuash daasé kúh ítchiimaachik. <sup>21</sup>Haak bacheé ilussheen ak dáakbisheesh daláakuua daásbahteeassalah. Daáskawiiassalah. Koótduulak baa an díoo aaláa daáshaamnaaloh. <sup>22</sup>Deéla baa ishkawáasheesh díiluh díš bacheéttuua al iláaush díaalah. Eehkoon dii íassiio xuh dii íasseessuulak ammaa an díaluaa ítchiikaalah. Hilósh “Hinna an baa hiléesh ítchik.” huulak kala koók. Haak dalásuuash díataahilaalah. Baxxiilaatúuash kusséesh an dáhchikittaalakuuash ko kala koottáahiliaalah. <sup>23</sup>Sáapdialuulahtaa díakaasak Baxxiilaatúuash ko baa díalaalakuuulak ko kala kooták bilaxpáakdak ko baa díalaalakussuuk. <sup>24</sup>Iwahkootduulak Baxxiilaatúuash an bakálee díalakbloom élahchekaasuuk. Is bilaxpáake ala kuúiluash díiluh dákuohmaachik. Haak hinné kalaaxtássaalah. Christ Dáxxiilaatuuash koók. Heem ishkawáashe dii hawúuk. Baa díalaalakuuluk buh. <sup>25</sup>Deéla ak baa iháatcheesh xaxúa ammaa iháattuua it kootáahkuulak Akbaatatdía kalako ii chilassihchíihmaachik. Akbaatatdía bilaxpáakeesh ítchi xuh xawáaulak ala chilassihchéesh ko kala koottáakuuhmaachik.

**4** Bacheéítcheen bilaxpáakuum dáacheelahkuuash díaitchiik baa kuxxáahtaalah. Haak hinné kalaaxtássaalah. An baaiiwaakoochihtéesh kuhtée díiluh díš bacheéítchikaasuush koolák.

**bale baa íkuchke ihéem**

<sup>2</sup>Dáhchiwakaau kuk kala koowéessaalah. Díhch íassiaalah. Dáhchiwakaaulahtaa aaláa Chísbishe dii iháass aaléih. Haak Akbaatatdía kusséesh “Ahóoh.” haakaalah. <sup>3</sup>Dáhchiwakaaulak bíiluh chiwakáawilikkuaalah. Heelak Akbaatatdía balee chúuss baa hilím shóonnahtaa Christ is baaaliichiweém íischiisaa xíakaatcheesh bíiluh ii biichiwaáulak ítchiihmaachik. Koótbawishim ii hilaakée bii daxtúuash koóhtaa <sup>4</sup>baaliichiweéítcheesh baachiweéítchiwaawiiish daacheesh heem al iikukkóon díawaawaalít dak chiwakáaahkaalah.

<sup>5</sup>Deéla Christ ak kalátchesseesh kusseé an diláau dak an díhchi dilúttuua dak ítchikaassalah shóonnahtaa daliíolak. <sup>6</sup>Haak bilaxpáake ham ilíiitchikaatuut baan iikukkússaatak íwahkootiiluk. Díiluh kootáalah. Heelak kal ammaa ala sheeláliiilush daacheesh ammaa an dii chiwáxxuulak díiluh ala kuss dilíliiilush daacheesh kal élahchelohmaachik.

**“Shóotaachi?” huuk.**

<sup>7-9</sup>Bakúpawachissuua Tychicus huaa bii kuxshéesh ít tak Baxxiilaatúua awáxpak baa hilakúuash díiluss déewahchewiik. Heelak shóotaa áawahkaatuulak dii chiwaáulak ii dii ittélituulak baliatuuk. Heem Onesimus huaa Tychicus áxpak huuwíak. Bakúpawachissuuash kúh hawák. Elahkuum ísko éhkooleesh koók. Heem ko díolak Tychicus biiwaxúash baapanmasshipúua dak hilaakée dak an bii bilaxpáake ii dii áxp iichiweéihmaachik. Heem kúh hilihtée baa ala kootachéesh ii dii áxp iichiweéohmaachik.

<sup>10</sup>Deéla hinna Aristarchus huum kúh bii áxpak daxtúuash kúh ““Shóotaachi?” hek.” chiwaawakúh.” hek. Barnabas huaa ísshóohte Mark huuash kúh “Shóotaachi?” hek. (Íischissaa kukaa kal ii dii áxp iichiwaáuk. Hinna Mark éhkussee déelak kúh biléelihkaak sapíhkaawakaalah.) <sup>11</sup>Jesus huum Justus kúh ii dáasaashiiluash “Shóotaachi?” hek. Hilihtée Akbaatatdía is bilaxpáake kusseé ak bii áxp baa hiléesh héeleen hileen iiláwiosh ittách Jews kootéesh kala koók. An bii kuxsúuash baatcháattaak bilaxpáake éhkaak baa kaláttuulak hiliatak bii ítchikaassaawakuuk. <sup>12</sup>Haak

Epaphras kúh “Shóotaachi?” hek. Aláxpanmisuua ko hawák. Christ Jesus ak baa hilakúuash hawák. Chiwakáalakuaa baatcháatcheik. Heelak an dífluuosh chichútak Christ ala kootéesh élahchekaasak an dáhkalattuuash kannaa baatcháatak heelak Akbaatatdía kal an dii baa hilíhcheesh shóotdak kal élahchelohmaachik. <sup>13</sup>Haak hinna Epaphras an baa hilé ítchim bíilaataahilia awákaak. Heem an baa hinnákkaaush baatcháachik. Haak awaasúualahuum Laodicea huuash dak Hierapolis huuash kuhtaa ak baa kalátcheesh kúh kootáakuuaalahkuuk. <sup>14</sup>Akbaalám Luke huuash awáchissuuash dak Demas dak kúh “Shóotaachi?” huuk. <sup>15</sup>Deéla Laodicea kuhtée koon bakúpuuash “Shóotaachi?” baak. Chiwaawakáalah. Haak hawátam Nympha huuash dak aasúua ak ishkawúuan chiwakáalahkuuash dak kúh chiwaawakáalah. <sup>16</sup>Hinna baawaalaáche dáamnaak diháaluulak Laodicea kuhtée akchiwakíash kúh kuss dáaweehkaalah. Haak eek baawaalaáche iháam Laodicea kuss déewahcheesh díiluh kootáalah. Eek Laodicea koon bakúpuuash dákuohmaachik. <sup>17</sup>Haak Archippus huua hinné chiwáalah. Hinna an bale baa hilím Akbaatatdía ko dii díahkuuash koowéehchessaak iháalihkaah.

<sup>18</sup>Hinna iháakasee bíilaataahilia baawalaáchik. Bíh “Shóotaachi?” baak Paul huuash bíik. Bii daxtúuash bii kalaaxtássaawakaalah. Hilísh Akbaatatdía dii daásdeekaashdakuoh. Ahóoh.